

四庫全書

集部

欽定四庫全書

集部

槧菴集卷十三

詳校官庶吉士臣龍廷槐

侍讀臣孫球覆勘

謄錄舉人臣秦 枏

欽定四庫全書

槩菴集卷十二

元同恕撰

七言律詩

次耶律左丞元日早朝韻

香霧霏霏濕玉闌，五雲仙佩響璫環。
春迴鳳竹參差裏，喜動龍顏咫尺間。
壽域乾坤開六合，蓬萊宮殿壓三山。
臚傳聲遠從天下，更覺唐虞日月閒。

紫陽故居

帝鄉渺渺白雲深
絲竹猶聞燕坐音
喜見舍人還白壁
忍令校尉摸黃金
淵源孔孟平生學
酬酢羲皇萬古心
聖代斯文有公議
合留華表映來今

題劉伯珍竹軒

歷歷當軒數十莖
氣分千畝渭川雄
歲寒於我有成約
一日如君不可同
疎影月來金破碎
寒聲風入玉玲瓏
作詩為問丹陽尹

時楊叔行
主醴泉簿

談笑能過避俗翁

登義谷有懷郝復禮雷季正

器宇眈眈未可涯
靄然風度足雄誇
論交久已心相許
講會應憐跡獨賒
雲斷水涵天影闊
樹分山帶岸容斜
相思不盡徘徊意
一片歸心逐暮鴉

贈張司馬

巖巖秦府殿西垂
山玉淵冰采不遺
人物已雄當世望
英華獨見士林推
龍旂虎帳奔趨地
貂羽金蟬顧問時
飲食易為饑渴後
春風看染杏壇枝

道遠兒生六七年矣七月逢閏

聚為父子荷天恩憶昔前裾復後襟有子有孫承祀遠
聞詩聞禮發源深相看彼此星星髮一念晨昏耿耿心
初度願伊逢十閏老夫勝備買書金

送萬御史雲南僉事

依依惟有戀行軒老諄何人敢贈言指下宮商能緩急
胸中涇渭了清渾幾時上駟容凡馬自古忠臣出孝門
旰食宵衣九重裏天南天北盡元元

偶成

天意人情不兩歧禍淫福善更何疑眼前事事須量力
身外悠悠枉費思靜對詩書探道要閒過朋友訂心期
百年憂患居多半却恐光陰得幾時

送文璋甫雲南幕長

玉壺寒露映簷紳秦府潭潭入幕賓九澤釀成胸次闊
五雲裁就筆頭春便為鰲禁登瀛客且作邛邰叱馭人
後夜相思渺何許西山晴雪鬱嶙峋

戒言

戶在園樞努在機關身寸舌莫相持仁而不佞斯為美
信有其徵乃可師多寡屈游宜自省設淫邪遁會人知
九原可作吾誰與時措從容公叔枝

送傅彥升雲南省幕

英烈江東信不忘隱然眉睫見堂堂佐州有愛形歌頌
議獄無冤著吉祥綠水紅蓮開偉觀黃金白璧發珍藏
幕中得士須如此聖治何分遠近方

送雷季正都事

粲粲安榴花滿枝西臺空幕送君時謝安本為蒼生起
賈誼元從年少知下馬除書應得拜登車攬轡不容辭
病身寂寞誰憐我明日愁來獨詠詩

送韓都事

西北藩垣控上游望深黃屋不貽憂政符分握調元手
賓榻頗居第一流已向艱難知氣節更從整暇得才猷
關河未信鄉書遠幾日西風鴻雁秋

寄雷李正都事

別來又是一年餘每就行人得起居潦倒麤疎無我似
聰明特達有卿如九關虎豹青雲路半世蟲魚汗簡書
爭道進賢相誤却此心不忍頓拋渠

蒙氏貞節

塞雲杳杳雁飛深三十年來百苦心頭上無情空白首
眼中有淚鑄黃金老人不乏兒能養小子常如我見臨
華表清風一千載鬼神呵守映來今

送喬元朗運副

許國崢嶸自昔年長才隨用合方圓
盛名已入策書例餘事猶居翰墨
先補外暫須籌劇務留中端合簞
英躔馬蹄三月桃花路去去脩門
五色煙

送龔子翱入蜀

夜雨青燈半世忙五千文史飽撐腸
風流又倒中郎屐人物曾登祭酒堂
匹馬蕭蕭雲棧雪短歌混混渭城觴
浣花遺築應須到為摘江蘿酌酒漿

送王君冕赴試京師

筆端清氣灑秋泉
剝覺乾坤賦子偏
王者四靈纔紀瑞
日華五色果成篇
刃經錯節敢言利
玉入洪爐始信堅
孔氏不殊今古世
敬王事業要人傳

又送王在中赴試京師

聖主憂勤圖治日
人才推擇輟耕年
久知德行符鄉譽
更喜詩書得士賢
分定果誰能巧拙
論功當自有媿妍
太平萬古吾儒策
明德新民第一篇

和張巨濟總管韻

託跡堯民在邑廛但求寡過敢求全進修畢竟工夫淺
賦予何嘗造物偏分死已停扶疾藥忍饑不續買書錢
形骸自有天真在只許鄰人會得仙

賀任節君

并序

任氏二母淑德懿範古之母師殆無以過國家高其
節行樹表宅里以為民俗勸甚盛舉也某密邇鄰居
聞風欣躍敢以四韻奉賀

華表巍巍起路傍一門誰有兩共姜閨朝蕙夕爭芬馥

桂冷松寒共久長地下機雲能飲德筆頭遷固會傳芳
朝廷論治先風教婦學于今得主張

寶母訓導圖

長記升堂拜母時春顏一掬剩溫慈鄰芳何世無彤管
庭草誰家有玉芝良治良弓千載事如賓如友百年期
何當一遇觀風使為誦周南被化詩

高燈

火齊龍宮不見收海風吹上碧雲秋光搖寶色三千界

影落珠明十二樓，陽燧半空留日鑒。
飛黃一點失星球，風流都入繁華手。
誰念隣牆把卷愁。

送鄭國華管勾

良世良才豈下沈，豫章劍氣九泉深。
葱葱佳氣山含玉，炯炯明心日鑄金。
往事何堪重回首，殘年最苦是分襟。
語君善養雲霄翮，再舉當遺萬里音。

送張知州

并序

夷簡節使葭州之政，無愧古人來歸，未幾輒復南行。

一子名以同祖蓋欲託為吾家諸甥且有來秋聚首
鄉社之約余惜其別之遽也猥語見意庶不盟寒乎
五馬駢駢快作州崑崙之水尚安流一錢父老劉宗正
百騎兒童郭細侯尊俎未成聯話榻尊鱸螯似促行舟
祖兒弄舌如春鳥洗眼明年太華秋

送劉善文雲內知州

孝子忠臣備一身今誰能見古須聞九秋不礙遼東翼
萬里應空冀北羣又作風流前輩想定知消息故園欣

兒童竹馬城南路還見吾家太守君

送蒙郎中任濮州

如何省幕輟賢賓守令朝廷注意頻
水旱連年多下戶網羅無罪少平民
幾時卓魯虞臨制此日龔黃得拊循
聞說兒童調竹馬濮州花柳待迎春

石榴

尚想猩紅點綠苔墜枝佳實已枚枚
九秋清露含珠滿一夜新霜裂錦開
丹鼎漫誇鉛汞就金盤虛薦荔枝來

茂陵應為文園渴天上移根地下栽

次韻酬程悅古先生

煙霞蹤跡眇人羣萬古詩書一小軒紙上聖心懸白日
囊中神劑試黃昏杏筵時雨留榮潤芹俎春風薦德溫
難老錫公天有意何當重款渭陽村

壽樂堂為賀平章賦

德邵年高五福全姓名共說賀公賢從容聖道無踰矩
嘯傲蓬壺別有天閒裏久諳雲水趣靜中獨養鶴龜年

儘誇萬石家聲好傾覆栽培理固然

壽雷先生八十

福翁八十更康強兩眼人驚射背光喬木衣冠餘朴雅
化城日月自舒長樽前磊落瑤池客膝下參差玉笋郎
有德有年公物論姓名爭與太丘香

壽趙翁九十

正大天興事不遺白閒春染黑絲絲孝心元是百年福
淳德猶為一世師綠酒辦誰留此日青山能我對當時

坐中況有蘭亭筆為譜堯民壽域辭

壽張詳議八十

先生本自將家雄又了長生久視功玉色暈紅潮兩頰
神光點漆照雙瞳時平不覓芝田友境好方為萊氏翁
仁者樂山山與壽一村滿吸翠屏中

送楊司業

聖主還須頌得賢和風甘雨此何年伯淳不識寧無罪
黃霸重臨信有緣爽氣西山凌積雪高標古柏樹參天

區區企華心猶在老馬長途不任鞭

送閻平章

地嚴綱紀選臣良詔下人爭覩鳳凰草木洪纖沾雨露
河山表裏入輝光聖人再世逢堯舜宰相于今有杜房
坐榻未溫還又去秦民何止淚千行

送董平章

清忠舊德簡深知秦省藩宣顧莫宜疊疊不遺經國力
惜惜獨有結民慈九重俄下馳前詔五府空餘去後思

試酌興言歌馬首一時淚墮送行庖

為劉氏題

并序

至大改元之夏友人張公輔館於劉氏園亭至則主人鎮撫公棄賓客者纔逾月公輔為予言鎮撫養親教子樂善不倦所謂信厚之公子者甚恨不及一際風度也其子顯出示山木先生為作萱春堂詩且請續貂其後誦未再四益信公之為可慕敬賦四韻以追一時之盛云

映階萱草玉抽叢人道忘憂是汝功白髮兒能慰顏色
繡筵花解領春風壺觴洩洩融融裏几杖油油翼翼中
令德一門終壽考舊家富貴見誰同

送楊時雍學正

環堵蕭然不自貧一窗朝暮聖賢春才華久已傾多士
學術真無愧古人藝苑高科真得雋芹宮小試便還淳
風雲千載衣冠地更覺鱣宮世業新

送王虛舟提學

寶豐佳氣鬱葱葱洗眼驚還玉潤中心印的傳千古祕
筆花妙奪九春工盛名久已歌京國遺愛行當紀穎宮
歸去先生真得計枕酣誰與發羣聰

十月一日拜程子益几筵

音容髣髴在斯留歷歷悲歡四十秋天地無情空白首
江河有淚寄東流寸心自擬酬知己好願誰教不到頭
叫徹九泉應解聽亦逢先姊問吾不

謝袁景韓御史

并序

伏承御史相公降屈威重辱臨蓬革繼以府尹君侯
墜致厚禮俾某預聞郡學教事某竊自念性資駑劣
行業荒毀爰自早歲兩目成疾浸淫已三十年暈翳
赤腫發無虛日五尺之間不辨物色屬此月餘右耳
失聽造物所以處某者斷可識矣雖欲冒昧無恥勉
給使令不惟無所裨益遂使興學勸士之意由某而
墮某之獲罪固不足言其為盛舉之累將何如也反
覆思惟不敢聽命閣下誨諭諄復誠懇切至所以加

惠某者腐心不敢忘謹以拙言見意仰謝萬一伏惟
改議深思期濟厥事某得依托休光安養殘廢畢此
餘年惠莫大焉望莫深焉惟是抗命之罪萬無所逃
繕錄奉呈不勝戰隕之至

早歲曾聞賦遠遊
黑衣童子巧相讎
風銷日鑠長年苦
霧慘雲昏跬步愁
淺學無成生負責
虛名誤得死懷羞
匏瓜分繫東西壁
敢辱招延禮數優

送郭幹卿侍御

并序

侍御相公借寇西臺遽有歸歟之嘆感念人生會合
為難輒賦小詩以道情素不自知其俗惡也

西臺方喜得斯賢遺愛誰知不滿年玉爵金罍清廟器
高山流水伯牙弦青宮論舊何如最白髮相離可是偏
一水盈盈多幾許好音無惜寄蟬聯

答李時晦御史

并序

某啟御史先生閣下達遠德範忽已數月遊川之思
靡日不東茲辱教墨知猶在渭南老疾不能一往侍

春風之席以豁滯吝悵惘曷勝謹次來韻奉答義厚
萬一且以代起居之問云

怪逢閨九鵲聲頻御史詩來恰上旬白雪陽春聲外律
光風霽月眼中人文章獨有次山老學術誰如孟氏醇
咫尺相望便千里舞雩從此不能春

送袁景韓御史

手攜三尺到分司公是公非兩不移眼底真能見鷓鴣
草間不復有狐狸清風肅肅纏霜柏佳氣葱葱秀露芝

此日東亭一杯酒知音多愧誤鍾期

送李儼夫御史

賢網清朝獵異才西臺未幾又南臺大公至正歸言議
細故繁文入剗裁虎穴定須生虎子龍閑元自有龍媒
君家再世能留愛選報秦民望早迴

送李慶長御史

九重圖治聖人心耳目懸知寄托深文綵春花雲冉冉
風標寒竹雪森森一簪白筆知能事千古朱絃足賞音

萬里雲霄在公等願將福壽鑄黃金

答郭幹卿侍御

并序

伏承侍御相公寵示盛作不勝欣感某病中兩過清
明意緒無聊思一見夷粹以寫煩紆而不可得徒東
嚮依依浩歎而已謹次高韻奉答庶幾發靜中一笑
一病還添百倍慵光陰多半枕屏中同人自笑與人異
生世誰為出世雄好事九分還錯過芳春幾日又成空
小軒羸得悠然處翠影離離弄竹風

送雷李正應奉

瀛洲自昔神仙地凡骨塵腥可問途
八表神遊有鄉在一揮立就況時須
已知鼓舞聞周誥更喜鋪張記舜俞
弱水從今三萬里日邊車騎望瓊都

有懷李仲和

日日思君不見君春愁藹藹疊春雲
行程屈指應須到消息縈心尚未聞
啼鳥藏枝驚綠暗落花滿地惜紅紛
閉門睡過清明了不飲長如酒半醺

新春有懷雷季正

露井梧桐一葉驚
眼看新綠換陂陵
春風南郭聯鑣路
夜雨西齋對榻燈
別裏情懷元自惡
病來面目亦堪憎
帝城風月無邊好
想與蘇州話我曾

送王文蔚教授

西風嫋嫋促行裝
遊子心悲手線長
神聖豈容孤孝德
公評自合到賢良
胸中秋月三更白
筆底春雲五色香
學館姓名知不晚
好將勤苦慰高堂

喜晴

東風一夜滿都城萬物欣欣總向榮
多病已無當世念惜春猶有少年情
酣眠座側貓春暖評語簷頭鳥弄晴
起喚吾兒理蕪穢小園簪玉已抽萌

寄韓尚書敬山

袞袞人歌用世才月梁顏色照崔嵬
一聲孤鶴橫江去百里金山入枕來
滿地白雲隨意往倚山青壁對吟開
幾時也踏悠颺路當為山林賀一杯

挽鳳翔高嘉議

笑談劇鎮了文移鳳里琴樽晚入思天路驂騑人共惜
雲臺梁棟世猶期才聞鼓吹還家樂遽起龍蛇直歲悲
墓隧幾時磨琬琰勒銘不屈蔡邕辭

挽李忠宣公

東笏垂紳誼匪躬中朝元老獨推公九重政切三台望
萬里俄悲一鑑空惠政治民深骨髓餘功覃遠泣蠻戎
堂堂不盡經綸業怨入麒麟檜柏風

謁亡友王文振墓

疇昔相從勝弟昆
白楊繫馬淚流巾
古人不必求三代
間氣元來畀一身
展也大成端有數
秀而不實果何因
朱黃留得詩書在
重恨傳家失阿麟

挽孟元亨先生

文章傳業翰林公
筆到蒙齋力更雄
信矣垂名千載後
惜乎埋恨九原中
甘棠有蔭商於土
弱藻無芳魯頌宮
宇宙高才日陵替
一聲長嘯古今同

挽潛齋陽先生

文獻中原坐陸沈先生崛起萬儒林百年醇正精微學
一片公平廣大心堯舜吾君空自惜朱張斯道更誰今
絳紗淚盡諸生地無復鐘撞大小音

送王道鳴郎中

幾日霜臺御史名郎官秦省倏聯英人才有筆能清濁
公議無言得重輕春水灘晴鷗鷺下朝陽枝穩鳳凰鳴
西州此後瞻風采太華峯頭月色明

送王郎中

臺府聲名冠近聯得君何啻遇豐年幕中未暖罷觥榻
袖底還揮驟駟鞭裊裊清猿悲峽月飛飛老鶴憶遼天
常時不那禁愁得況把離觴駐道邊

謝石仲溫郎中

臺閣聲名冠近聯得名由我相公賢坐令西府增榮觀
長恐東都墜聘賤曹史執經馴禮化鄉豪懷牒避公詮
太平幸際人文盛億臥衡門信有天

送鄭有文郎中

雲泥蹤跡每憐殊取友何期亦到予
方寸感知雖獨厚三年報禮愧全疎
心丹耿耿酬恩日德玉溫溫積善餘
誰使斯民霑福澤師門今看定何如

送韓進道郎中

荊州面骨玉崢嶸一見令人雙眼明
未要文辭推用晦剴教名節數殷卿
寒衣餒食三年用白璧黃金萬口評
久此賢勞知不可高軒詠罷獨含情

送穆郎中

公家了事有斯人，玉爵金罍世共珍。
六品尚沉員外置，三年真得幕中賓。
高堂娛侍何如樂，故里榮歸別是春。
今日秦民兩行淚，幾時却拜馬頭塵。

送曹侍郎仕開

眉宇方欣識紫芝，襃旌又賦送行詩。
人才果有唐虞盛，議論肯為秦漢卑。
陸駕川航嗟不器，秋霜春露見能時。
柏臺幕下松千尺，氣奪紅蓮庾杲之。

自述

鬼神能我寸心明敢學班侯厭管城下地固應歸汙濁
朽材但可事炊烹孽由自作終難追運到乖違莫强行
如此頭顱過四十區區憐汝太癡生

送劉民望

并序

民望英契兩為縣侯政平訟簡民食其德著譽縉紳
間朝廷重慎刑官必擇廉正明悉忠厚慈良者職之
擢民望甘州路推官蓋以地重事難委任尤不可輕

於其行也鄉人同某謂選舉得人民無刑濫之苦治
道其庶幾乎為賦小詩以效古之贈言者

徒法無人不自行以人任法到刑清五情既得須三覆
一死何從可再生如玉如金王度在有為有守子名成
選才方為公家賀不用臨岐唱渭城

次杜同知韻

結根九地豫章深重負須堅脊骨任良治良弓千載事
難兄難弟百年心舞雩始識歸來詠流水還聞太古音

細味君家好詩句一杯薦以洞庭金

渠菴集卷十二

欽定四庫全書

槩庵集卷十三

元 同恕 撰

七言律詩

寄藍田李耀卿先生

耳目聰明八十餘天教留在世師模溫純如此古未有
中統以來今更無暮水朝山歸道悅春蘭秋菊入詩腴
龍門一欸三年最清夢時時繞坐隅

書感寄郝復禮

當年萬事倚天公歲月因循失舊容足跡舉頭三义路
人心對面九疑峰挽河滌禍嗟難辦倒海除愁畏不供
珍重西源隱君子一丘何計得相從

送史參政之鄂省

勲名後耀接前光鄂省移參詔趣裝直以忠心期稷契
不教治蹟讓虞唐馬蹄芳草馳情遠鳥語飛花說恨長
後日西州頌遺愛甘棠何止賦三章

送張伯高參政

并序

參政相公位秦省者僅一歲遽拜北京廉使之命勉
賦惡詩錄呈閣下蓋不勝其依戀也

緬思中統至元間接武斯文有孟韓老翅不歸華表鶴
韶音纔聽碧霄鸞百年相業期司馬五府蒼生屬謝安
相見幾時還又去區區懷抱若為寬

送汪參政

黑頭閥閱數名臣屈指中朝更幾人儉節清風聞遠邇
忠言碩畫贊經綸唐公不種私門樹崔湜能吟上苑春

補袞熟知天下望西州獨有幸歸民

春山四友歸來圖

四翁一笑萬緣輕白首能同里社情三輔河山還舊觀
百年文物主齊盟兒童解說衣冠盛草木猶歸咳唾榮
鬼護神呵圖畫在瑞光長映德星明

哭劉元禮

方期孤鶻快秋空雲翼何知向此窮千里苦音來故國
百年幽恨閔玄宮長才不見當時用英傑猶生後學風

慟哭寢門非我最論心如子更誰同

哭郝復禮

苦學如君見未曾四更風雪短檠燈胸中歷歷千年在
脚底駸駸萬里能人事但知多不偶天心誰謂果無憑
即今有話何從說一日悲來幾拊膺

自傲

算海誰能到底深春冰虎尾政斯今下愚蠢蠢無先見
上帝皇皇有赫臨老稚街頭三尺喙聖賢紙上七分心

此身莫道吾能了不入洪鑪不是金

病中有感

曾慕秋雲萬里鴻神駒未駕哭途窮謀身本自無長算
造物何嘗有不公膝弱每須扶杖力目荒已廢讀書功
兩髀肉盡無餘幾豈止衰如八十翁

送趙子敬侍御移參浙省

西臺功最倚申卿南省諮詢待魏徵了事定須忠力可
知人獨有聖心能民憂耿耿今華髮道任拳拳早服膺

時雨時風又攜去鳳凰山好浙江澄

病中夢寶長卿

一榻蕭然臥再替故人夢裏接芝眉江湖魚入相忘地
星月烏啼未穩枝白髮因循人易老蒼天反覆事難知
歲寒只有青松好却恨青山費買資

夢

天地人心一理通陽開陰闔自無窮百年翻覆七情裏
萬境馳驅一枕中軒后政須求力牧仲尼端合見周公

覺時記取先賢語可卜吾家學問功

讀錢神論

伊昔英豪恥利言即今萬善乃斯原能令父子全慈孝
解使夫妻足義恩愚富參商猶效順智貧骨肉尚生冤
懷清臺上西風淚三月衣巾有漬痕

秋懷

殘髮蕭蕭雪點蓬衡門歲晚只衰翁交情豈是不相念
貧病自知難與同一逕古苔餘落葉滿城寒雨又淒風

回頭三十年前事可信浮生是夢中

答周元舉

黯黯前途足駭機
蕙蘭真有不芳時
尋常紙上猶興嘆
邂逅眼中那免悲
雨葉風花朝暮局
霜松雪竹歲寒期
楚聲聽讀卜居好
會有人能譜此詩

答鄰舍生

一硯塵窗四十過
黑衣童子巧相苛
大倫於世敢獨廢
薄命在天當奈何
數卷南華元過詎
兩編義易會無譌

秋花不比春花好隨分風光養太和

答蒲城劉先生

并序

提學熟齋先生道宗德奧智巧絕出創為雞毛筆書
葆光二大字遺某副以超然雄篇感德之餘愧無以
為謝謹次嚴韻錄呈几下庶發莞爾之笑云

兔毫從此不能纖何物囊銛可敵尖左幹右旋仍健捷
順揮逆掃却安恬八旬尚有力千斛一字端須價百緡
蓬華雲生墨池潤先生義浸與仁淹

書齋醉臥

餘醒未解困曹騰小向書齋寄曲肱風竹一時低舞葉
日窗幾點過飛蠅惺惺對酒心先醉燕燕營巢力不能
採藥靈源終有日嘯歌猶得氣憑陵

史參政頌德

政論陪榮外府聯宸心妙揀得才全明堂禮樂家成教
喬木衣冠世象賢智燭有光能徹地仁元無礙可通天
會須一正臯夔席袞袞增華太史篇

晉寧石彥明高義

要從鄒魯識吾鄉富擬封君見未嘗振寡逮鰥功不淺
達才成德慮何長百年為善知多福再世能賢信後昌
翠琰留教姓名在學林終古照天光

二月十一日初得小雨

老薺陳根綠未萌曉寒春半尚崢嶸麥秋那有斗升望
禾種纔勤畎畝耕霑足幾時三尺雨死傷隨處萬人阡
茫茫真宰無從問誰遣陰陽累好生

崔參政禱雨有應

饑吻嗷嗷沸海波相君有力挽天和
山前馬到雲先合
廟下辭陳雨已多坐使焦枯歸潤澤
盡迴咨怨入謳歌
臥龍不為東山起奈此蒼生歲月何

王總管祈雨有應

鰥寡無辜政此哀忍令旱魃更為災
寸香直喚龍淵起
一雨還隨馬足來疇昔臣忠由我祭
只今天孽為誰開
左符參錯皆公輩和氣當知遍九垓

韓都事家竹生芝

瑞物生來積善家
天公幽意不人遐
翠枝裊裊扶霜節
靈草煌煌茁玉芽
半夜鬼工溥沆瀣
千秋神嶽孕精華
春蘭堂上慈親壽
堯叟堯咨共拜嘉

送廉右丞拜集賢學士

堂堂魏國力扶天
有子如公實象賢
善治規模符遠略
敬王事業發真傳
正須陛下求多士
未許關中借一年
九里無窮河潤浹
不勝思後更思前

射虎圖

過客常憂性命危將軍除害有神機
雷號怒吻千山裂血迸深瘡一箭飛
草樹淒淒空野色旌旗獵獵捲風威
酒杯斫取頭顱用載錦傳呼得雋歸

壽李右丞

已獲玉帳卷征塵行省須勞借筋頻
四海蒼生同正朔三朝元老有經綸
丹青議入文章舊羽翼功垂宇宙新
眉壽天方錫純嘏六星光映紫微春

壽雷經歷

策杖南來記昔年紅顏綠鬢尚依然放懷宋玉陽春曲
得意堯天擊壤編畫閣靚深喧笑語春風嬌軟雜歌絃
泰山如礪河如帶好在鴻濛澤上仙

几杖雍容里社間眼中耆德更誰先一門孝友知今最
五福休嘉見獨全饋醕行當西序饗姓名不減洛圖傳
年來更覺方瞳力妙墨晴窗日課千

壽先師張彥明

聖門荆棘鬱蒼蒼夫子西來一破荒經術向勞推董賈
詞源詎暇論班揚學緣知本心彌篤志為無求老益剛
文物有歸天意朗夜來南極燦華方

壽汪中丞

將相天門世德家孫曾袞袞發英華幾經時雨蘇三輔
又見清風肅四遐大雅政須歌召虎周書不獨紀君牙
南山便作無疆頌春酒思柔酌翠霞

潁水蒼煙鬱老槐相君直欲挽春迴中天日月六經在

萬世綱維五教開比屋可封還舊俗朝廷隨用得良才
丹心報國心如此合有穰穰福祿來

壽楊和卿并序

和卿鄉兄年已六十乃有九十之母耳目聰明起居
健勝人生所未見也敬賦小詩為壽蓋以致嘆仰不
足之意云

白髮康強九十親斑衣萊子雪髯新世間樂事有今日
壺裏風光無此春願對清樽瞻壽母水令懿範表鄉人

如君境界方為福富貴元知福未真

壽雷仲介

并序

大德二年戊戌仲介契丈居第有嘉禾生秦之長老
奔赴往觀或圖其象以傳者皆曰是家夙著孝義天
其或者以是表之耶不然何瑞世之符近乃在几席
間也唐開元中楊炎三世以孝行聞逮炎有紫芝白
雀之祥門累旌異至樹六闕本風俗以化天下先王
之政也若仲介兄弟競爽世濟其美視楊氏宜無少

愧嘉禾紫芝感應之妙均矣賞一以勸百放諸四海
準國家之典有司之事也素巖賈公敘而發之傳永
無疑里人同余掇其遺意敬賦四韻嶽降之朝奉以
為壽亦以為賀也

露葉猗猗秀北堂一枝五穗見禎祥兄金弟玉門閭貴
祖蕙宗蘭譜牒芳神理百年無爽鑒鄉評此日有新光
君王著意移風俗六闕何人舉舊章

壽竇長卿

漁陽疊疊著家聲人喜昆雲見老成握手尚能追昔好
刺談每為倒平生向來忝與詩書席晚歲當同鷗鷺盟
滿酌年年今日酒柳梢春意恰相迎

海變歸來記昔年兩翁談笑更歡然箕裘愧我殊無似
詩禮推君獨有傳三尺堯階非遠到一瓢顏巷足稱賢
東風又綠西城柳管送春光入壽筵

玉樹臨風列雁行士林共許白眉良一經矻矻忘寒暑
萬事悠悠任短長檻下神駒非久伏篋中良玉但深藏

忝予幸託通家舊願采瑤英薦壽觴

壽郝復禮

不隨流俗信浮沈高義班班聳士林
皂蓋朱輪他日事青燈黃卷半生心
感君今昔情如一於我交游分最深
壽骨已應千歲法春盃莫厭十分斟

壽李仲和

寸心相許十年初每愧先施義報疎
迷不知方無我似老能務學有君如
筆鋒欲截西崑玉眼力可窮東觀書

仙苑有根培雨露子枝孫葉自春餘

壽雷仲介

神丹忽挽笑顏迴巷語隣逢亦樂哉澤物不為誇俗計
起家元有過人才老親强健承顏日諸弟懽愉上壽盃
天意屬君非草草要令世道識栽培

摘得梅花泛壽觴梅花勝似去年香斑衣舊日名萊子
拄杖而今字伯康萬卷詩書崇德里一襟風月舞雲鄉
優游人世三千歲不用神仙却老方

壽妹婿楊叔行

頤齋門下記同遊俯仰驚看十五秋情意不緣今日好
絲蘿重結百年儔青天白日真無負夕藿朝藜詎足羞
帝意寧知非大任舉盃一笑渭陽舟

壽大人玉山先生

歲寒堂上壽慈親玉立風標凜若神學造精微功愈密
詩成談笑句尤新平生忠武田間事此日淵明社裏人
白髮紅顏今日酒坐看滄海會飛塵

孝友堂前白髮親鄉間共指謂仁人癡兒未辦尋常用
慈父長如九十春盛德豈容豚犬述真姿願與華嵩隣
梅花酒美年年日底是人生樂最真

壽曾孫硯郎

老病相尋到九分豈期今日壽曾孫幸逢造物栽培力
感極先君覆露恩一硯家傳無長物六經闕學有真源
看兒眉目生如此好讀吾書日鑒軒

讀昌黎公傳

兩耳梟音世久聾青霄鸞鳳協商宮唐家翰墨有邊幅
孔學宗元無異同出聖入神當健筆剗肝瀝血想孤忠
潮陽萬里誰云貶天意寧知是賞功

次文都司喜雪韻

寶花吹墮五更風和氣潛回太皞宮南畝寸根三尺潤
貧家一飽百憂空聲酣老竹雲叢瘦光溢寒梅玉頰豐
莫怪詩來清似水冰壺世界納胸中

龍芳亭

幾回乘興問仙槎香霧霏霏濕鬢華翠玉颭風迎夏竹
錦雲烘日殿春花歸來園裏纔三徑安樂窩中第一家
誰主誰賓初不計平生痼疾有煙霞

讀朱子象刑說有感

三尺昭昭聖法平幾時高下得人情忍心敢謂無天理
遂惡方知據禮經前度覆車真目擊此來故轍却身行
千年徒有騶虞感誰為絃歌發古聲

題樂閒亭

燕坐虛亭日又東南山佳氣鬱蔥蔥竹聲風碎琴中玉
花影雲搖酒面紅人世猶呼瑞安令仙家新署樂閒翁
往來誰識門前路只許柴桑杖屨通

送潘獻臣擢掾南臺

蚤歲龍門負雋聲青檀還我故家卿萬籤綺帙三冬足
百斛明珠一字輕公論向來堪上選人材今日有臺評
馬頭長路平如砥也得遐方見率更

賞月

桂月流光萬里天興來不減子猷船霏霏墜露衣從濕
矯矯凌風意欲仙傾倒誰如有今夕笑談重得是何年
若為肯駐瑤臺影一刻黃金不論千

睡

挾矢張弓粟髮間此身何地可謀安試看元亮枕方穩
便覺羲皇到不難一榻松風三伏暑半窗梅月五更寒
是中大有真消息胸次誰與抵海寬

寄族姪伯剛

味甘啗雪與餐檀纔有商量度厄年性自理來那有惡
情隨欲動易成偏儀秦都是幾人貴顏閔終為萬世賢
秋葉春花不須議吾家素業要人傳

有感

草根切切語寒蛩雲際翩翩響斷鴻萬事回頭俱是錯
一年轉盼又成空愚兒幸繼清修業濁酒時澆磊砢胸
造物無心管人事漫勞唇舌較窮通

對菊有感

徂歲堂堂下坂輪東籬又見菊花新聲名已迫無間地
疾病仍攻有限身每愛古人能用短可憐世態酷憎貧
一樽幸有人分似

雷仲介
餉酒

且與肝腸作好春

送景從周錄判

兩袖春風上玉梯幾年王邸姓名知驂騑開道無千里
鴻鵠飛雲又一時囊裏攜多經國論卷中題徧送行詩
都門車騎如流水人說西來定是誰

夜思書所聞者為之淚下

吁嗟一早酷如焚禍入網常不忍聞暮鼎狼孫烹袒肉
朝砧頑父擢兒筋平時善教無師帥變裏腥風盡賊羣
天殺天生云有理陰符三百果誰文

送魯同知

別駕南州寵數新海沂歌罷到吾秦月波一片藏心夜
雨潤三年濟物春循吏古來聞有傳明時今復見斯人
餘生溝壑誰留在父老田頭語最真

枕上偶成

幸在先人屋數間一身臥起有餘寬斯人不與吾誰與
行路昔難今更難秋菊春蘭時嘯詠冬裘夏葛適暄寒
也知方寸無多地那着悲歡事萬端

行

下深磅礴上崑崙乞我形骸萬古春紙上得來終覺淺
脚根到處始成真有為自可符玄德中慮猶當輩逐民
約禮博文明訓在永懷欲罷不能人

送杜行簡縣尹

脩脩清譽動西臺煙暖藍溪玉有胎學道愛人知素蘊
剽繁治劇見長才三年撫字懸深望百里歌謠在暮來
只恐飛黃須逐日不容花縣久徘徊

送李廉副上都留守同知

藩府聲猷尚藹然春風更覺繡衣鮮人從朗月壺中見
事向清霜簡上傳良吏規模隨用足明時衡鑑得才全
非公管鑰誰當付又聽民歌少尹賢

癸巳除夕書感

決去駒陰挽不留燈前恰四十年休一身能有幾日健
百疾都無半月瘳日暮途遙空浩歎人亡絃絕但深憂
陶鎔也費黔羸手九品難登下下流

一作細思也廢甄
陶手合是人生第

幾流

春分後書感

寒食清明次第催春光恰似不曾回
塹空花木鶯無語
圻盡房廊燕不來
坐賈行商唯賣餅
前號後哭但求哀
百年名郡今如此
說是長安可惜哉

己巳歲九月書感

佳節空令九日遭饑腸雷火苦煎熬敢言孤悶須杯酒
誰辦千金具一饒老雁無聲寫情素寒蛩不聽和哀勞
黃花也負西風約知汝東籬不姓陶

送楊無妄

三年不見紫芝春夢裏能成笑語頻垢盡何妨還鑑舊
器虛方可受泉新無情日月控搏幾有分乾坤賦與均
老柏清霜凜然在定知不作使君嗔

送盧景芳

并序

景芳茂異吾友盧君達臣子大參公孫也好學有志
秀出多士今治肅政檄赴汴梁勉為此贈

白玉堂前白玉枝風流還許見當時經尋表裏春秋業
筆挽縱橫月蝕詩閱閱幾家能有子雲霄此日更先誰
不然滿酌玻璃酒聽誦離騷也自奇

送白天民

邂逅秋風識紫芝脫羈霜鷁不凡姿掾曹應對奇三語

簾府吹噓絕一時快句河山歸跌宕浩歌杯酒入淋漓
病夫未展平生得草草今朝又語誰

送李正德

左看成矩右成規手底辭毫五色奇不見幾時如得疾
清言終日可忘饑玉煙舊積兩峰潤蘭露方深九畹滋
八座文昌天上府人才自有鑑衡知

送權李王

義檄區區祇為親烈夫肝膽不差貧好將北闕聲華重

聊作南州草木春，有志不應無小試。
挾才如此豈常屯，承明召對當非晚。
傳語維揚陌上人。

送雷季正

把酒臨分瀝水頭，一鞭星去望前驄。
也知不作丁寧別，只恐空遺宛轉愁。
淡淡月華歸路晚，蕭蕭風色去程秋。
夢魂兩地今宵共，但道青燈對榻留。

送毛行簡

人道男兒志四方，我知前輩審行藏。
吉凶悔吝皆由動。

險阻艱難要備嘗粗有良田供歲月且無公政及門堂
池陽一片英魂在悵望無依亦可傷

送毛彥脩

明珠在側每心驚何物牢之亦見稱有學有文寧易得
不驕不吝更難能一函久鬱龍泉用萬里今看騷囊騰
豈獨光華賁名族吾門猶待子門興

送陳畊道

并序

畊道賢友開朗不羣受業勤翁之門翁蓋許其善學

誠身之效親悅友信矣至治癸亥江西憲司掌文簿
行既有日為賦二首奉贈

憲府巖巖握紀綱東西曹務盡才良行身優入詩書域
游藝爭先翰墨場佳弟風流還子敬難兄步武接元方
政須保此垂天翼九萬扶搖本已張

洗眼平生得子奇華峰秋隼不凡姿百年行遠升高學
跬步臨深履薄詩原隰不禁霜露感門閭難忘暮朝期
男兒能了家門事旅力經營信有之

送段維則

伯蘭仲蕙藹芳聯季也春風玉樹妍昭世堂堂公選舉
名家衮衮富才賢詩書義了五車讀文采光新累紙傳
老眼增明有今日為歌黃鵠覩方園

送焦溉臣

一家三世業星經關輔人人識姓名剩有通明傳乃父
不將勤劇讓諸兄光搖湖水浮春碧翠點君山對晚晴
此去知君富奇助歸來吾欲問經行

送高鎮方

熊圖春風長養奇，擾雲秀出歲寒姿。
獨提一筆來鄉國，快草萬言供主司。
擇士政須先德行，設科況復值明時。
修途萬里堅車在，躡險摧剛待駟馳。

送蕭勤齋先生

再遣皇華起草廬，釣竿未許拂珊瑚。
本根事大勞明主，羽翼功深付老儒。
殿下有言求見切，山中拜詔遇知殊。
太平萬古危微學，豈獨光華載典謨。

送侯伯正

并序

勵齋先生儒林師表運使劉公請主解學敬賦以詩
以道別意

古人精力絕到處吾子從容追及之白璧黃琮自然貴
麒麟鳳鳥豈無時清風一榻詩書友絳帳三年弟子師
後日解梁談故事客竒都自主人竒

送王裕之

并序

裕之縣侯秩滿北上侯昔掾江浙省日朝廷訪求遺

典侯於福州得夾漈鄭先生通志書板上之始終凡
五年天子甚加稱歎於是乎有興文署丞之命既以
親老求補外得縣於扈最其能跡蓋鄉評也

皇廷文治蔚垂休先哲遺書待發幽祕府能令儲世寶
宸居曾此識風流三年已策民功最百里難為驥足留
人物權衡有公議九臯况聽鶴聲秋

送李凝仲

并序

凝仲茂異才幹德美蔚有父風今為富平縣侯作此

贈行老謬不足為詩聊以識吾喜耳

牛刀不讓武城先琴奏和於單父絃宰縣古來難稱職
朝廷今日政求賢蛇頭蝸尾隄防密蟬腹龜腸料理偏
謂饑民也愷悌靈州古君子生男如此豈非天

渠菴集卷十三

欽定四庫全書

集部

架菴集卷十四

詳校官庶吉士臣龍廷槐

侍讀臣孫球覆勘

欽定四庫全書

樂菴集卷十四

元同恕撰

五言絕句

任元方所藏畫虎行立坐卧四首

颯颯黃茆風漠漠青林靄
前山時一來恐有藜藿採
奮身若欲前佇視發深省
猛氣雖有餘焉知無陷穽
錦衣奪日明巍然負巖阻
善幻雖妖狐奔走敢予侮
擇食一飽餘當闕橫突兀
誰哉烈丈夫怒須敢云觸

田父暮歸圖

來鋤百畝雲歸荷一肩月永念遺安人清風渺林樾

七言絕句

方山樵隱圖

方山山下德人居雲挽霞牽賦遂初造物會將人料理
萬籤讀遍鄴侯書

佳處溪山信有神等閒不屬結茆人拾遺已作金華主
數到君家戶牖春

許中孚履齋

脚底分明有坦途枉將骸骨試崎嶇
呂梁千尺能飛度
未說渠儂是丈夫

徐尚書母善行

未饋中堂歲獻衣女公孤幼得依歸
偏親更盡私門孝
莫說今賢古亦稀

好還天道信分明有子能賢位列卿
綵袖春風舞眉壽
夫人真足慰平生

送石瑞夫長官

馬蹄春草踏晴芳又喜東川得望郎
若到金華煩與問拾遺曾有讀書堂

士林清譽藹翩翩匠氏掄材杞梓先
公賦從今不難集遠民纔識長官賢

秋原夜寂圖

夜涼吞吐月華清養得毫光鋒銳成
炳煥六經垂萬世留皮豹死愧虛名

題繡菊兔圖

養成月窟千秋魄
種出霜園九日花
一寸鍼芒有元化
桃花詩裏更宜家

題張總管歲寒堂

反哺恩深解組時
孝誠一念有天知
髑髏不識西河守
安用身前齧臂兒

不盡紅塵衮衮忙
幾時寸地有清涼
一尊好就東籬約
永吸歸翁晚節香

行齋

勇義孳孳恐有聞聖途無愧百年身山河共說長安好
耳到何如脚到真

題朱陳嫁娶圖

不教桃李失當年隨分資裝有幾錢只願無憂到黃屋
他村誰似兩家賢

錦烘繡錯爛盈門一例公侯與庶人草舍柴扉長兒女
不知婚嫁白頭新

江亭曉望圖

平遠寒林主夏盟
輞川未暇入商評
此圖不使諸公見
可信前賢畏後生

竹溪六逸圖

園嶠方壺未即歸
人間風月暫遊嬉
多情却被舒州杓
留與徂賦好詩

禹門變化圖

人道魚龍變化難
禹門千尺瀉驚湍
桃花過盡春多少

霖雨何當救旱乾

溪山歸隱圖

結茅擬欲住溪山
青送浮嵐綠遶寒
八九人生不如意
眼明只向畫圖看

侯伯玉一齋

洛叟丁寧入德途
整齊嚴肅要工夫
長教一寸虛靈在
管此堂堂七尺軀

送趙剛中歸福建

馬首東風萬里家北堂萱草玉抽芽阿嬭淚後還成笑
怪見燈窓作夜花

閩江路穩賦歸歟器業多君發聞初况是長沙門下客
治安應熟萬言書

題雪逕驚風圖

三窟虛營狡獪名穀中日月自多驚餘糧棲畝都能幾
誰遣蒼黃雪裏行

題萬壑松風圖

筇枝瀟洒洞陽仙日月東西自一天不著松風連萬壑
遺音誰與和朱絃

送杜良輔大理宣慰同知

芒芒玄土海西東聖德如天覆
同手足人言壯心腹
計深慮遠屬才雄

踈山閒步圖

東阡南陌無愁歎暮序朝庠有誦聲
吏牘程寬公事少
踈山聊得抱琴行

送方推官之江陵

六年州佐玉無瑕
馬首春風路不賒
已聽江陵獄中說
老槐能見有棲鴉

李白待月圖

眼高四海若無人
豪氣崢嶸筆有神
誰是知音可轟飲
仰天坐待轉冰輪

謫仙待月圖

澄波萬頃橫吾舟
樽酒何人與獻酬
明月神交最知己

飛來清駕不遲留

吳彥文鐵硯

一硯相傳子與孫清風三世讀書貧直教穿破何妨在
政好殷勤遺後人

送強顯卿吳堡令

澗崗危路渺翩翩羸馬風霜堡令賢王事有程誰敢後
白雲長在淚痕邊

浩浩黃流帶在胠十年無吏治文書令君不幸居民幸

勞苦飢寒撫養初

玉泉冰潔照西臺盡道卿非百里才治本清朝先郡縣
山公啟事莫多猜

塵窻老硯信推藏誤愛如兄愧莫當細數花陰多半別
又將消息問諸郎

蓋彥澤孝義三首

元功季業兩難方一賦猶爭日月光
衮衮醫林竟誰氏
傳家三世有名郎

兩親蓬顆委他阡肯為宗盟費一錢泉土永安千歲骨
人生惟有子孫賢

先後霖霖窆日晴天心應識孝心誠一朝偶爾容渠說
還見休徵辨兩京

贈卜者順理齋

父母乾坤受此形存吾順事沒吾寧矯言擅說雖奇偉
有耳平生不敢聽

來今往古世何窮衮衮形骸萬變中不有主張誰辨此

須知得處本無凶

克紹齋

翩翩令德藹前聞
詩禮傳家子又孫
看取良苗費鋤治
不容他草穢芳根

李鵬舉抱拙齋

萬古斯文仰日星
回愚參魯聖師評
無窮流惡人間世
盡是當年弄巧成

巧力兼全萬世師
後來孟氏獨能知
不思不勉從容妙

自有生民孰盛之

題三友圖

高材直節真男子
玉色敷腴古德人
英秀所鍾均動植
眼明快見畫圖新

題羣蟻分蝶圖

朝從蕙徑暮芳欄
若箇光陰把玩難
一枕漆園無籍在
爭教惡夢到槐安

題小圃秋容圖

老芥著花兼紫白
甘瓜垂蔓間青黃
登盤莫作熊魚想
此味齊民不可忘

敬義齋

天君無物重虛靈
正路平平不窘行
尚父丹書凜然在
為君大字作齋銘

浩然南歸圖

前日襄陽孟浩然
灞陵風雪裊吟鞭
而今書劍南歸日
依舊飛花落絮天

清溪暮歸

人家渾在半山中垣屋雲林隔幾重朝去暮來溪路熟
聯翩後跡踏前蹤

少陵醉歸圖

烏帽斜欹兩鬢絲相將驥子與熊兒致君堯舜平生事
驢背誰知醉後思

題風雨迴舟圖

乘興來時天似水惱人歸去雨和風百年行止真難料

一日陰晴尚不同

牛挽水車圖

初解耕縻汗喘長却來挽轉水車忙
西風擺撥三千頃背上吳兒且莫狂

王氏家譜

祖字親名已失傳服猶總免更茫然
尋源索本能如此王氏從來有後賢

羊舌先生木訥齋書

玄天無臭亦無聲百物自生時自行一寸心田有人種
功無穢穢不秋成

一元萬古貫無垠惟有先生解力存回也如愚參也魯
短喪予也號能言

貧樂齋

陋巷顏回求志日舞雩曾點詠歸時溫泉寒暑四時事
造物何心乃我私

資深亭二首

物華天寶寫冲融妙意都歸觸目中山叟溪翁問無恙
一樽時與酌春風

揚州騎鶴更腰金費盡人生幾許心不到歸翁舒嘯地
那知春雨一犁深

題趙翁樂壽亭

雲闔烟開萬景新乾坤留我一亭春傍人便道神仙是
只恐先生意小嗔

戲嬰圖

畫屏開處午堂閒儘着兒嬉博笑歡辛苦蓬窻窻下女
一梭寒雨夜將闌

題春晴戲鷹圖

沙禽容與媚春晴烟暖波平不自勝
吻血爪毛誰汝惜
馬前爭看解條鷹

幾善堂

性天萬世有希夷一脉情初事却危
日用工夫敢輕議
火然泉達政斯時

安善堂

求仁索義力孜孜去盡吾心有為私脚底一條平直路
出門無日不由斯

秋江待渡圖四首

船去船來幾渡秋夕陽還見立沙頭搖青蕩翠山如許
不作浮生半日留

白浪浮天正渺瀰船頭未轉欲何之無情老鴈西風底
又到沙頭佇立時

鏡面秋光萬里開
片帆吾欲訪天台
篙師大似知人意
撥轉船頭急急來

遠水長天一色秋
微茫草樹點烟洲
岬南岸北何時了
十個行人九白頭

汾陽王蕃錫圖

畫筆殊恩一一精
太師真足慰平生
圖成九錫非無策
遺臭流芳可自評

周曾捕魚圖

擬掣鯤鯨碧海中阿任辨作可憐翁寸鱗尺尾能吾醉
一棹且乘前浦風

千里秋晴圖

人烟陸送川迎裏樓閣霞紅靄翠間灑落江山一千里
太平風景會追還

千家山郭靜朝暉來者無聲子美詩李范有靈應絕倒
名家付與後來期

陳正叔西溪

山川何處無形勝人傑方知有地靈從此西溪與盤谷
大行千里獨青青

思誠齋

萬世無愆幹化機理非至寶詎能斯聖門極效論參贊
須信工夫始不欺

千載思與授受心一堂參倚信功深薰然內外交孚地
妙用何嘗間古今

錢舜舉畫梅

風月長憐恨南北玉梅不識夢中花
吳興有筆開江路也到西湖處士家

徐承旨寄李絳齋梅花圖

江東渭北兩詩仙玉笑瓊談幾隔年
不遣西湖風月使相思誰為寫悁悁

餘花顏色淺深間月魄風魂摸索難
宣仲十年心獨苦西湖絕景要人看

淵明歸來圖

累葉高勲翼晉朝身為臣子敢辭勞眼中九鼎誰扛去
一曲歸來擬楚騷

夷叔而來有此翁偶因圖畫見英雄都將黃菊青松事
辦作乾坤底柱功

天地無心浩浩初歸來容膝有琴書南山秋色人千載
髣髴樞衣問起居

得雷季正書因成四絕

三年兀兀夢中身粉首剗心痛未真時有清談賴相慰

更堪去作玉京春

雲錦華星落九天
開緘一讀轉淒然
羣疑滿腹無從釋
握手如何尚未緣

故人咫尺雲天望
猥我煎熬兒女情
眼底一飢曾不療
敢言有策濟羣生

兩眼昏花疾勢深
看朱成碧苦難禁
無端強借溫風便
淡墨斜行寄此心

性善堂

太極分明造化根
人人靈府種深潭
聰明不是顏曾獨
自謂顏曾有力存

聖門孟氏有深功
兩字光明日月同
不用茫茫尋下手
熊魚但味七篇中

許由擲瓢圖

歲時伏臘不難謀
里接隣逢笑語稠
頭上堯雲一千尺
無煩箕潁為相留

洗得先生兩耳醒
又隨東下一瓢傾
無窮人世無窮事

不辨當年潁水清

病中有懷

紫芝眉宇卧龍才
霽月光風絕點埃
死恨不能趨席末
胷中茅塞幾時開

頽然一室坐經旬
俯仰呻吟憶故人
應為塵機紛擾擾
德音何事久湮淪

送孫忠符教授翠昌

聖學重開日月明
絃歌是處魯諸生
釣臺一脉春泉碧

流作吳山山下聲

送張教授

孟氏云亡學失真詩書不暇善斯人清風一榻槐陰裏
擬聽師生誦說新

送程堯章教授

十年講學仲舒帷潁水雍容喜得師但使後生知俎豆
不為無補聖明時

送晏教授

一官休嘆廣文寒學行如君古亦難
後日清風見鄒魯
諸生衮衮進賢冠

送張教授

蜀州自昔富人賢又向談間得子淵
儘有鳳雛松桂裏
羽毛五色待翩翩

送馮抱甕之平江教授

山翁汲水抱圓缸澆得東籬菜甲香
自喜一年生事了
看他隣屋桔槔忙

瑞光

瑞光千丈日生東萬象毫芒在眼中一點空花生外翳
坐令五色眩青紅

題陳參政止善堂

事業人生有聖賢半塗未敢謂車堅滄洲不發千年秘
闕里空留入德篇

題郭氏修德堂

服膺勿失顏公善任重要務曾子仁往宙不同同此宇

寸田自有發生春

益恭堂

聖德如堯錄允恭各驕可使鄙周公名堂疏義無嫌贅
好在臨深履薄中

稽中堂

妙理權衡日用間吾人何受受之天洗開膠漆盤中眼
一點神光觸處圓

明德堂

天爵人人貴自如裂冠毀冕獨何愚九原可作知言叟
共對春風詠舞雩

肖德堂

每恨髯超後却翁賈門何慶有兒充青青肖德堂前草
纔識春暉長養功

卜者王雪舟

擾擾人生混兩儀縱橫歧路競奔馳雪舟有夢清如許
為我前途指險夷

又贈卜者

化機萬變事難知，但愧行身昨日非。
有智如君等著蔡，淵冰能我到全歸。

麥浪

滿川雲綠瀉油油，勢逐南薰浩欲流。
苦海迴頭成陸海，濟人從此不須舟。

把氏公論墨迹

寶匣聲聞綠綺琴，沙中誰遣拾零金。
無窮日月隨流水，

只有墦簾一寸心

山谷糴米真迹

元祐風流不可還
森森遺跡徧人間
平生談笑奇憂夢
何似親瞻令尹顏

讀狄梁公傳

陽德猶虞入諫難
更堪乳虎卧天闕
區區口舌爭唐祚
不是精忠豈得還

狼虎猶全父子仁
如何私欲滅天倫
千秋廟食無姑鬼

能悟君心有此臣

智參政化盜傳

屋茅抱去口呼乾白壁完歸可是難人道偷兒心已死
先生元有返魂丹

孫登長嘯圖

山入蘇門幾許深時時聞有鳳凰音粗疎可惜嵇中散
不領先生學易心

渠菴集卷十四

欽定四庫全書

槩菴集卷十五

元 同恕 撰

七言絕句

贈劉仲深

并序

仲深劉君讀書孝友兄弟競爽觀勵齋先生贈言可
以得其為人矣勉賦小詩二章續貂其後

蘭兄桂弟鵲鄉鄰仲也閭閻玉更溫為孝為忠初不異
須君高築里中門

蜀山形勝馬蹄間
眉宇崢嶸照雪寒
若遇浣花溪上路
草堂何似試尋看

贈張瑞之行義

堯舜人人信可為
圭璋自碎不渠知
太平幸見時雍俗
起本張卿舉德詩

祖券持來責負金
倒囊何計歲年深
有孫不識翁翁面
祇恐難明地下心

贈曲端父義行

見義勇為能萬一無心責報更何人
皇天老眼分明在有子人言進德新

驟雨

雲如潑墨湧山前急電奔雷去復還
擬看傾江洗煩暑夕陽影裏雨斑斑

獲麟圖

靈物天開瑞聖符手中有筆紹唐虞
九原若對桓文說淚更多於反袂圖

咏左傳鉏麇觸槐

好惡人心有至公情波一潰滅天衷君省此士何為者
義魄仁魂尚鬼雄

雲巖

白雲解作此山春時卷時舒也自珍雨翠晴嵐一千里
知君不負百年身

過潼關

馬蹄今日出潼關一髮終南是故山天意若為衰老計

明年應許得西還

題二鼠圖

只知山果盡羣猿鼠輩如何亦肆餐
饕餮貪婪幾時足
貧家一飽欲謀難

夷齊首陽圖

畫裏依然見首陽至今薇蕨滿山香
馬前不有磻溪老
西伯幾為後世王

赤壁圖

嘯歌容與月明舟從此江山不姓劉天下英雄果誰是
鄴雲無地可埋羞

題桓伊三弄圖

老竹柯亭截玉堅鳳凰聲徹九霄寒使君慷慨不凡處
且就清溪約略看

華陰驛夜別王君冕

處處離傷可奈何明朝不是舊山河長明燈裏三更話
別到商州淚更多

瞽者青秤

福極陰持賞罰權雜施善惡自何年九疇得叙彝倫日
未省低昂有此偏

善惡分明是兩歧福從何作禍何為浮雲萬變無窮裏
好為吾人語所之

雙虎圖

老木清溪萬石根兩雄文錦射朝曦爪牙如此那休得
瑣瑣狐狸不足吞

益齋

損己益人方是益損人益己損還多語君細翫皇羲畫
去盡私心養太和

麥隴眠雲圖

玉杵玄霜夢已闌褐衣不是雪衣斑南薰浪卷東臯綠
且得棲身畎畝間

趙醫省齋

今古高高厚厚間人生皆可到曾顏
搗須解痛抓須癢

血肉原非木石頑

蒼華奇人奮士林姓名飛入九重深
黃金須買無瑕玉
仰止高齋扁榜心

河東韋先生省齋

兩脚前途阻且修
直須一步一迴頭
聖狂絕去同霄壤
分處還從一念不

明皇友愛圖

華萼樓前春日遲
天恭天愛發舒時
風流只有開元盛

小雅誰歌常棣詩

宗駙馬都尉李瑋竹石圖

老竹霜餘抱節奇
新篁抽雨葉離離
湖山佳致天留在
說與高人勝士知

明皇吹簫圖

玉榻薰風晝漏遲
鳳簫一曲試拈吹
神心等是無為樂
得似虞絃解愠時

秋巖

南山秋色兩嵯峨人勝能留境勝多朝暮雲霞是知己
飛來窓戶共婆娑

曾畫史

朗澈神襟萬斛冰筆端造化賦羣形幾時摹我廬山本
六子風流仰日星

題山水圖

畫筆森森有典型斯文老學入題評傳家故物能留在
子敬青氈浪得名

水色山光日日新一庵老我太平身百年此分誰真有
容易休看畫裏人

古木寒泉圖

老柏輪囷閱世奇冷泉一脉漱雲遲
我來笑拂蒼苔石
琴以淵明歸去辭

題晴江疊嶂圖

雲屏烟練霽光飛翠影紅霞目一圍
開卷令人發深省
埋頭塵土是耶非

山堂讀書圖

翠騰紫鶯朝昏裏烟吐雲吞俯仰間一榻松風對賢聖
判知無意到塵寰

題李壽卿畫山水

幾家籬落枕江濱江水澄澄日欲曛人倚危欄娛晚景
眼隨歸棹沒孤雲

一榻塵埃兩膝穿眼明快此覩江天鬼工有識應嘆道
漏泄詩家句外禪

題徽宗畫竹枝雙雀

樂意相關鳥語多
春風奈此竹枝何
紇千山遠終飛去
生處無人說與他

題錢舜舉畫杏花金翅

遺山老子關情處
爭醉西園十日紅
酷是吳興有才思
不教春事惜怱怱

題趙子昂畫梅鶴

歲晚惜惜一室幽
玉壺冰雪洗窮愁
故應老鶴如人意

也為清香盡日留

煮茶

一甌春雪浪花深
慣戲龍髯聽午吟
欲火不攻今夕夢
十分助我歲寒心

淵明小像

精衛虛勞塞海平
人間何事更關情
東籬不著黃花友
濁酒逢誰可一傾

寶繪堂

山色龍蔥接海隅波光一碧浸東吳若教寶繪堂中有
不作烟江疊嶂圖

程女去後因成六絕

庭樹連朝鵲喜頻歸寧消息十分真團團笑語能多少
留我春愁日日新

別去忽忽拜我前老懷無語轉淒然豈知南陌東阡日
翻作浮涇泛渭年

大女移居不遂初誰令汝亦去先廬歲時只有三娘在

里數猶為二十餘

貧裏尤傷父子情苦無尺寸佐勞生孰知得罪皆由我
連坐猶當有重輕

衰病相仍一世鰥苟留殘喘在人間公私無補毫分力
俯仰唯多有厚顏

汝母云亡已八年眼中風物尚依然蕭蕭隻影寒窓底
誰遣歸程奪我先

寄女嚴三首

鶴崖魚窟路間關，旬月無由一往還。
寒食歸寧見鄰女，

舉家回首望西山。

鶴崖魚窟庄內鄉姓盧氏道中

添丁學語巧於絃，詩句無人為口傳。
竹馬幾時迎阿姊，

五更教誦水蘭篇。

眼前兒女最關情，不見經年百感并。
聞道全家解禪理，擬從香火問無生。

送張公輔提學

翩翩行李鴈頭雲，泮水清風姓字新。
堂上應占烏鵲喜，

綵衣下拜有餘春

曾孫硯郎百晬

雙瞳剪水照衰翁
天許曾孫晬日逢
世世傳家惟一硯
春雲要見墨花穠

敏政堂

枹鼓稀鳴百里間
強能知畏弱知歡
一堂後日人應說
未省從前有此安

藍田韓尹存樂堂

黃髮雙親白髮兒萬金一刻惜春時清風百里絃歌地
儘有歡謠勸壽卮

樂佑堂

千丈春暉寸草心恩光沐浴海波深烹龍炮鳳玉為酒
此日此生難重尋

求放心堂

華構深局百貨儲主人終歲事馳驅壞墻破戶羣偷入
活計歸來似昔無

送王季恒幽州學正

鄉曲他時有令譽
校官此日得文儒
春風絳帳新平郡
童子人人仰範模

西溪亭

獨占州中八景三
天施地設豈吾貪
一杯試酌東川水
不似西溪味最甘

題孤秀軒

尚想仙翁手植初
龍髯瑟瑟嘯霜腴
凌雲有筆同千尺

我道長春秀不孤

六駝圖

兩駝斂草一駝鳴
蟲鬼三駝卧不驚
沙水茫茫雲萬里
畫圖留在看昇平

題張總管歲寒堂

慈親婉婉千年秀
孝德溫溫四氣春
十萬城中纔有此
天教人識歲寒人

康節婦

從一而終矢靡它南山高節兩嵯峨千年彤史流芳在
黃鵠纔聞第二歌

劉氏母貞節

壽母康寧八十餘凜然高節慰鄉閭青袍更比斑衣好
眼底孤兒玉不如

題桂軒

宛宛龍姿雨露新小軒盡對四時春誰濡曾次無塵筆
盡作西湖處士鄰

陳憲副家藏女史箴圖

人欲橫流不可當左圖右史費周防閨門若有深長慮
合自能言教此章

俯首榮名賊后朝區區補闕亦徒勞一箴似勸屠兒佛
歎息韋忠着眼高

虎溪圖

八表先期汗漫遊超超老鶴翅輪秋九屏一息須臾爾
枉著區區物色求

夾竹桃花

粉萼相含絳袂鮮
西風嬌淺不勝妍
武陵溪畔三生夢
清景蕭蕭亦可憐

宗伯明致愛亭

先生一卧白雲深
魂魄猶應戀故林
不為生兒得能孝
如何還足愛山心

題韓尚書家藏米元章帖

當年集古入毫芒
誦讀而來孰短長
妙處都從苦心得

若為口快說公狂

郭先生集義齋

心無愧怍氣方充
要就斯時驗我躬
千萬人前見曾子
始知天下有英雄

壽張詳議八十

斯德斯年福已奇
兄弟後古今誰椿
津致位能台鼎
史策終慙壽域碑

烟江罷釣圖二首

勇退曾期筮仕初踐言端的似君無鏡機先識歸翁意
為寫烟江罷釣圖

落日澄江萬里秋翩然一葉下吾舟玄真自解知時節
不為多魚到絕鉤

東陵

東陵自是神仙宅壯觀斯樓在一湖我欲憑闌問消息
回翁還肯再來無

月明歸棹

衝烟去即比鄰共載月歸時老稚迎魚少水多生事了
一溪晴碧有誰爭

烟江歸棹圖

空濛林屋瑣烟扉一棹春風興盡歸安得從渠買鄰住
朝來暮往共晴暉

竹塢鳴琴圖

膝上絲桐几上書道人本自愛吾廬青青種滿塢東竹
白鶴時來問起居

趙氏先訓

頃刻無忘祖父言袖中拈出見能傳趙家世有賢孫子
滾滾方來福若川

題郭節婦

信學閨門久失傳幾人無愧蓋棺年兩髦忽聽朱絃奏
合作房中雅樂先

劉周卿夫婦孝節

玉色春容鬢髯前誰令吾學失參騫手中一信同生死

重嘆先生有婦賢

鞏氏貞節

夏侯令女全仁義宇宙無窮有此人
燕雀豈知鴻鵠志
固應甘作草頭塵

席氏遺訓

累牘翩翩筆不勞丁寧行已付兒曹
冷然月白風清夜
誰有先生一著高

李氏遺訓

漱潤含芳幅紙間風流何幸接先賢區區辦作兒孫計
誰有贏金四海傳

寧縣尹並頭蓮

令君餘日寄擊浮手種芙蓉艷綠波不用甘棠說遺愛
江妃聯袂聽絃歌

讀姚錄事送行詩

閭閻不識催科擾犴獄無聲捶楚冤萬戶春風有今日
鄉賢端的是知言

偶書

兩脚侯門實畏登
一人誤愛十人憎
何如堅坐林間石
樵牧時時接話能

馬圖

古人學問無遺力
名姓方為後世傳
兩馬不緣留絕藝
久知一炬逐飛烟

地上為龍亦自奇
德稱信是出羣姿
食芳飲潔長年裏
主意殷勤知不知

矯矯雲間八尺龍誰留神駿筆花中控銜不入金鞭用
已覺長驅萬里風

內馬圖

天駟流光孕此奇玉花如印尾如絲已空十二閑中選
更看朝燕暮越時

張長史家藏古笏

十字依然拜朧初歲華冉冉易云徂細旃廣廈平生地
尚記從容一語無

哭雷孝述

一死休為短世悲
直從初度到期頤
錦囊留得歌詩在
李氏於今尚有兒

棣華堂

不負堂堂萬卷書
玉昆金友藹怡愉
化行可配時雍俗
莫作尋常見畫圖

晚翠亭

橫嶺側峰常日晚
紛紅駭綠四時春
銅匱一炷悠然處

剩覺乾坤不負人

韓氏瑞芝堂

貞潔堂前日月遲
壽帷依舊掩春怡
玄州暫赴麻姑約
來與兒孫種瑞芝

程總管瑞桃

仙果何年得此株
老親歲歲壽雕虞
翰林有筆能模寫
便是君家瑞應圖

蘭

猗猗綺石託芳根一種幽香別是春雲鎖霞局藏不得
賞音隨世有靈均

蠅拂

纚纚銀縷細梳風烏几蕭然伴此翁長恨青蠅驅不了
煩君一掃笑談中

遺安老人家庭海棠

寄傲軒中一樹芳風流十倍錦官粧紅雲滿吸玻璃酒
不用花香有德香

天生九物足移人況是遺安庭戶春酒面紅雲搖不定
德香薰染夜來新

五老堂

冠帔簪紳五老人無窮宇宙一堂春須臾起滅空蚊蚋
驚見鸞祥鶴瑞新

壽王惠迪

出語兒時便老成王家子弟不須驚如今政要佳眠食
九萬雲鵬第一程

甌山三載不窺園門下清修得鮑宣婦似少君真不惡
知人誰有此翁賢

舊家情好不磷緇風靡波隨又一奇摘得梅花艷芳酒
歲寒心事有深期

壽母卷

侍宴歸來北斗城瑤池風路渺秋清笑從方朔先生問
人世蟠桃也種成

壽壻程仲允

賦予人生莫負天寸陰好為惜華年兩翁伊洛堂堂業
後世能無嗣續賢

長記當年生汝時先君元有歲寒期春風玉骨看如此
善繼不忘外祖詩

壽妻弟朱彥守

以辱門闌照映中隱然眉睫見尊公傳家百畝蕙田好
子子孫孫用不窮

堯庫區區暫屈君在官恰勝在家勤轅車有足能千里

直遇孫陽見不羣

風骨巖巖洗露清方瞳炯炯日爭明
絳人甲子何須問五月元從嚮福生

送蕭九萬

後凋松柏歲寒知華袞誰能到聖師
鳳翼鸞枝可深惜蟲雲千尺看他時

送趙信臣

兩年筆硯誤相從淺陋殊無指引功
我與曾顏均覆載

莫教辜負百年中

送李周臣

生世榮名錫以人靈犀一點識吾真修途辨取追前轍
顏孟如何便絕塵

送陳嘉會

但使胸中貯古今朱絃無用覓知音盡歡菽水晨昏事
一寸光陰一寸金

送劉生

葱蘢草樹四翁山青佩橫經杳靄間
沂水春風一千古
擬從此地見追還

送盧景芳四首

桂笋蘭芽種自香更教言語妙君房
如今人物權衡地
不負尊公萬卷藏

離筵相對更情深如子何憂不帶金
過眼浮雲無定態
慇懃留在短檠心

衡嶽當年紀勝遊朱張名跡故應留
憑君為向山靈問

曾有人賢似此不

桂笋蘭芽好弟昆
聯飛侍下樂昏晨
願公福壽如金石
散作家家父子春

送焦漑臣易良州同知二首

聖世幅員自古無
海東直到海西隅
恩波盡是涵濡地
良吏經營正所須

能仕如君信不疑
遠人今有樂生期
單車九折邛郫路
記取王尊叱馭時

送焦天民

安飽吾身不暇謀
早知嗜學有君如
崔嵬九仞何難事
看取而今一簣初

送楊無妄三首

書社相從愛子賢
四更風雪短檠邊
苦心如此那休得
餘事猶當富五千

木根培養力須深
羣聖相傳只一心
馬健車良有今日
修途萬里看駸駸

渭城烟柳葉飛黃始信離歌解斷腸兩字祝君須強飯
鬢毛容易又新霜

送韓德卿

聲華靄靄集儒林信有青雲一諾金自是男兒少勤苦
百年行路不崎嶇

送紀伯剛

卷中三復送行詩忠孝為心福有基雲表長材一千尺
便從拱把識瑰奇

送程子達昆季

松檟芊芊返故園
子平心事欲何言
鵲鴿原上孤生草
看到春風綠更繁

次勤齋韻并序

訪程悅古先生
迴夜濟涇河大風雨
岸危不可上
遂宿舟中戰慄之甚
勤齋公有詩因次韻

昏黑催人到渡頭
破船風雨壓驚流
路危莫上南來岬
蔽置舟中委纜浮

憂來無語但垂頭何意殘年罪入流
鼻息齁齁似雷轉
先生真與道沉浮

挽蕭勤齋先生

南山龍去忽雲拏榮潤誰生草木花
陰鬼陽神君不見
風情雨緒亂如麻

詩餘

鵲橋仙

韋國器約賞梨花

鶯鶯燕燕蜂蜂蝶蝶酒債幾時還
徹韋郎又約醉梨花

對一樹玲瓏香雪 盈盈脉脉翻翻折折小雨朝來乍
歇一年最是好看光陰算只有清明三月

前調

香飛玉屑光凝粉蝶不比精神瑩徹春風一樹倚東欄
還稱道仙肌勝雪 憑誰與說容吾揀折老去情緣未
歇觥船一棹百分空直喫到花梢有月

臨江仙

壽寶長卿

我友西溪上老耽書未省華顛春工醞釀一家天花欄

紅日染柳岸綠風牽 有子有孫蘭映玉可人不墜青
檀吟詩酌酒過年年幅巾藜杖子好箇隱神仙

附錄

元故奉議大夫太子左贊善渠菴先生同公行
狀

先生諱恕字寬甫姓同氏系出晉大夫伯子同氏之後
遠祖居太原文水世業儒五世祖仕關中遂家奉元高
祖清貌魁偉性忠孝宋季以年逾八十賜爵進義校尉

曾祖安善讀書不仕祖昇孝行冠鄉里宗族二百餘口
異世同居庭無間言顏其堂曰孝友賢士大夫讚詠成
軸以先生貴贈中順大夫禮部侍郎上騎都尉追封京
兆郡伯考繼先博極經史潛心理學詩文有法金末避
兵關東李翰林庭訓奇其年少不凡妻之以女中統間
平章廉公希憲叅知政事左山商公挺宣撫陝右辟京
兆路交鈔庫使號玉山老人有玉山集贈亞中大夫集
賢直學士輕車都尉追封京兆郡侯妣張氏溫柔淑惠

閨門雍肅追封京兆郡夫人先生風度凝遠總角如成人從願齋先生張彥明學日記數千言終不遺忘同舍生秀拔者十餘輩先生最幼攻書義學校提舉五峯張器玉珠江李彥通二先生以與人不求備檢身若不及為題試諸生考及先生卷五峯先生批云義理詳明文辭瀏亮宜為此會之魁時年十三咸稱遠器而同學者亦以為弗如也自是德進業修聲譽日著年末三十辟禮部吏不就至元三十一年咸寧王野仙公平章陝西

行省事以編纂世祖實錄辟為掾事畢辭退隱居教授不求人知行省行臺交薦其賢不啻百草至大四年仁皇御極大徵天下耆德以儒林郎國子司業聘使三至不起延祐改元奉旨領教魯齋書院規矩載新學校增重時詔天下設經明行脩科以取士偕勤齋先生蕭貞敏公黜考試秋闈三年秋又為考試官前後取士人服其公六年英宗在儲貳重簡師傅徵為太子左贊善官奉議大夫既見春宮慰問賜酒已乃上書云云又與賓

客伯都劉賡等共陳裨贊五事仁皇賓天以疾辭歸致和元年六月除集賢侍讀學士使者奉中書平章趙公世延書集賢直學士貢奎啟為申朝廷意重望其起以年高致仕先生溫粹安靜小心畏慎非禮不動於世味澹無所好非其道一介弗取義所當與雖在窘迫無絲髮吝性整潔雖衣布素未嘗染纖垢大暑亦不去冠帶讀書端坐敬對或理有未得終夜以思事有未知旁稽所自必融通而後已軌轍程朱履真踐實不為浮靡習

事親定省溫清服用旨甘分所得為者竭力盡誠得其歡心母夫人張早卒事異母婁如所生及卒哀戚葬具與先夫人等年二十七遭父喪一遵禮制而毀過焉目因成疾祀事齋戒精潔致愛致慈儼如神在嘗曰養生有不備事猶可復奉先一有不誠是無神也罪可逃哉或疾故不能親與異日必申敬載拜以告世父三教都提舉順安先生紹先疾革會宗族遺屬舊塋在青家社距城不五六里慮後有城郭溝池之患勢必當遷葬次

須以昭穆及考玉山先生卒迺以遷塋事謀之諸父兄
率陳利害或出怨言以沮之從者蓋一二竟以哀懇感而
見允改卜今咸寧縣洪固鄉三趙村之北如順安先生
命葬焉族之人不畀市塋之直者先生代償之至是沮
者見其土深禮具悔諭族衆曰今而後知小五真孝子
汝輩當效之小五先生之行第也異母婁生二女姊適
伊川程先生六世孫彥謙先生敬之如母與之語未嘗
敢坐蚤卒後數年彥謙亦卒惟遺一甥恭先生憐其孤

而賢其才以女妻之妹適同議京畿宣撫事松谿老人
楊琬子臨潼縣主簿順正寡而無子且失明有宅一區
俾歸主簿之猶子迎養於家殆二十年而卒備禮合葬
祀其主至於今族孫菑卒穿壙塋中得古石槨雕琢工
緻其子行遷其骸取其槨以葬其父先生聞之愕曰昔
之葬者亦猶汝葬其親以圖安於永久也今而奪之心
其忍乎亟命還其骸斂以衾褥窆槨元所仍割牲為文
以祭之御子弟僮僕曲盡恩義有過則導以善言終無

怒詈而子弟僮僕各盡其分畏而愛之先生取與由義
里人有借騾而死者償其直不受曰在家亦死此物數
也在京師館衛率府見役卒鄭行易者容止異常名與
語果嘗讀書業醫貧老無子孫服役於此先生憫而白
於府俾免其役而隸醫籍焉先生家無儋石之儲叢書
幾萬卷手不停披怡然自適詩文不苟於作詩喜陸放
翁而文慕周益公扁所居為渠菴又號其軒曰日鑑期
以自警日以篤信好學守死善道為事嘗誦古人與其

有求於人何若無欲於己與其使人可賤不若以賤自安之言曰此先得我心之所同然者書警座右且示子孫其子毅學富有幹才克承其志素以先生前日之養玉山老人者養先生率諸孫白首侍側隨所意欲具以盡歡一堂之中愉愉熙熙不知夫貧窶之在身珪組之可貴也接人則誠敬交盡雍容謙抑無所勉強見之者如坐春風飲醇酒憮然心悅而誠服貞敏公居南山下德業為四方所仰與先生友善尤篤入城府必主先生

家士論所歸以蕭同並稱自赴詔而還優游家居者十
有三年不妄出入四方達官士夫素聞先生之名過關
中者必請見一覩容儀而接道德之論皆自以為足願
也先生教人隨其才之高下誘掖激勵俾各盡其所欲
學有所未通則曲為開導使皆有以得其趨向之正有
疑問答之必盡其詳嗜學而貧者辭其束脩之禮始終
游先生之門者竟以千數服教感德往往有如父子者
其成德達才推於時用於世者亦往往有焉鄉里稱先

生而不姓皆知其為渠菴一若昔人之稱安定先生者
至順二年二月二十一日以疾終于羣賢坊第寢壽七
十有八有文集若干卷藏于家將終遺命子孫曰死生
亦常事喪具當稱有無不可徒事觀美汝等各務修省
以繼世業無為祖宗辱卒之日識者無不弔弔者無不
慟不識者無不驚怛而傷悼也娶朱氏京兆路同知搏
霄之孫講議官炳之女慈惠恭順言動有法躬勤織績
佐先生禮事二親於窮約中克執婦道內外姻親皆法

其賢延祐六年七月二十三日卒追封京兆郡夫人或
勸先生再娶乃曰我今年老所娶苟賢猶非其宜否則
為禍我家今兒子兒婦幸能事我安用娶為子男三長
即毅次懋先卒次馨女三長適儒士王司貞次即程恭
次講議孫朱矩皆先卒孫男六再思以先生廕受將仕
郎宜川縣主簿辟行御史臺令史次慎思九思若思近
思繹思女二曾孫男三寧孫硯郎廬郎卜以是年三月
九日葬三趙村新塋之穆會葬者遠邇數百人服弟子

服者半之皆哀哭執紼送至墓所孤子毅將謁文誌其墓門人賈仁謹次第先生操履之槩以備采擇焉至順二年三月望日門生賈仁謹狀

元故太子左贊善贈翰林直學士亞中大夫同文貞公神道碑銘并序 集賢直學士朝請大

夫兼國子祭酒富珠哩翬撰

仁皇踐阼闕陝大儒同先生即其家拜國子司業秩儒林郎使三召不起陝西行御史臺侍御史趙世延請置

魯齋書院于秦中書奏先生領教事制可學益增重延祐六年以奉議大夫太子左贊善召入見東宮賜酒慰問退獻書陳古誼盡開悟涵養之道明年春英宗繼統以疾歸致和元年夏六月拜集賢侍讀學士使召以年且疾辭至順二年春二月廿有一日終正寢享年七十有八三月九日葬咸寧縣洪固鄉三趙村之原兆序之穆夏四月其子毅以家載謁泚秦川傳郎徵銘神道之碑泣曰子知先君是以託昔珦客秦以諸生見先生禮

欵猶等夷今廿五六年矣其敢以菲陋辭先生諱恕字
寬甫姓氏出晉支屬始家太原文水縣始祖仕遷關中
高祖清重大耋賜爵進義校尉曾祖安善祖父昇晦不
仕昇以先生貴贈中順大夫禮部侍郎上騎都尉追封
京兆郡伯考繼先贈亞中大夫集賢直學士輕車都尉
追封京兆郡侯同氏世儒素篤忠孝侍郎時家族二百
口居無間言名其堂孝友集賢博學能文故相廉恒陽
王宣撫陝右辟掌庫鑰號玉山老人有文集妣夫人張

氏生先生安靜端凝總角如成人從鄉先生學穎出儕
伍日記千言不忘會試于學書義魁衆時年十有三知
者以遠器期之至元間始分六部丞相東平忠憲王命
選名士置吏屬秦以先生貢禮曹辭不行三十有一年
國史修世祖帝紀采事四方陝西行省平章政事咸寧
王屈先生為省史典編錄事已即退居教授名益聞延
祐開科再主鄉試人服其公先生溫粹畏慎動循禮度
雖大暑不去冠帶衣素未嘗垢其學由程朱溯孔孟務

貫決事理以利於行事親竭力致養喪集賢毀致目疾
時祀齋肅詳至嘗曰養生有不備事猶可復追遠有不
誠是誣神也可追罪乎始舊塋逼城郭溝塗而柰昭穆
世父紹先智士也患之謀卜遷合禮而未果會疾革聚
族命之集賢卒先生始以世父遺言謀諸父兄往往泥
拘忌沮難之以理哀感允徙今塋族有不畀市地直者
為償之既葬皆悅曰土厚而禮備今而後知吾小五真
孝子也先生行五族衆目之母張夫人卒事異母婁如

所生婁氏女二長適伊川程氏六世孫彥謙次適主臨
潼簿楊順先生事程姊如母應對不敢坐夫婦卒教育
其孤恭長而賢以子妻之順無子妹嫠而有宅一區先
生畀其族子養妹以終族有穿墻得古石椁者取之用
葬其親先生聞而駭曰昔葬者亦猶汝欲固汝親也奪
之忍虐亟令衾褥納故骸其椁寔仍舊割牲為文祭之
鄭行易者儒而醫貧且老為衛率府卒先生至京館其
府目其容止異之與之語知其然為白府長免卒役慈

祥多此類平生非義不取當與不吝里人借驛而死償
直不受曰物之數也何以償為家儲無儋石書幾萬卷
手閱心惟適然自娛扁其居曰渠菴軒曰日鑑稽古有
言與其有求於人何若無欲於己與其使人可賤不若
以賤自安曰是先得我心之所同然書警座右與人交
雖外無適莫而中有繩尺故集賢學士貞敏蕭公居南
山入城府必主先生士論稱曰蕭同自京還居十有三
年縉紳望之若景星麟鳳然教人則各因其才造之未

達則曲為開導使得趣向之正貧有志則簡其贅謝先
後來學殆千數鄉里稱先生而不姓將終詔子若孫曰
死生常事喪稱有無勿事觀美務脩省繼世業無忝祖
宗終之日識者無不弔弔者無不慟門人遠近畢集祖
送哀慕如喪其親雖行路莫不嗟悼夫人朱氏同知京
兆路事搏霄之孫講議官炳之女克執婦道中外師賢
前卒追封京兆郡夫人先生遂不娶子男三人毅慤馨
女三人壻王司貞程恭朱矩男孫六人再思蔭將仕郎

主宜川簿辟史行臺慎思九思若思近思繹思女孫二人曾孫男三人寧孫硯郎廬郎毅有學行善承其家孝慈篤志不忍斯須違親左右華髮婉容帥衆子婦侍杖屨問所欲盡親之歡先生康寧壽考德望日隆毅有相焉邇惟世皇淵潛魯齋許文正公被教來秦士風翕然趨於正先生之徒相繼而出形於文藹然仁義之言見於事卓然仁義之行也嗚呼可尚已其集若干卷藏於家有味仁義者將有采焉於是秦省列先生之行以聞

制賜翰林直學士亞中大夫輕車都尉追封京兆郡侯
諡文貞銘曰瞻彼太華終南蒼蒼涇渭東注洪河洋洋
高厚攸遠風化所自孰智與仁川流嶽峙昔許文正來
數于秦大雅繼出斯阜儒珍惟同氏宗世衍文學挺生
渠菴先我後覺始以深造終也自得守道之闕游理之
域孜孜其善翼翼其恭循循其度穆穆其容有蓄必施
由已及物朋來林林戶屢填溢進退出處惟義之從枕
肱飲水其樂融融屢空益堅雖老益篤志不渝渠渠菴

是目造次顛沛誠以行之衆莫不信予用明之今其逝矣休聲赫然河華同永著銘新阡

魯齋書院禮請司業同公先生主領師席疏

維昔京兆迺世皇啟湯沐之邦爰聘覃懷命魯齋闡闕洛之學時熙元化治洽周南然燧改而情遷在人存則政舉今也闢一畝而建黌宇立尸祝以興四科以收人才高山仰止盍重臯比之席尚虛模範之師伏維司業同公先生學蓄淵源胃蟠今古窮經佚老咸稱孔穎達


之多才辭祿居高退安楊巨源之晚節聲聞于外道積
厥躬茲欲脩鹿洞之遺規敬用屈安定之雅望下為郡
國衍菁莪之澤上為邦家育豐芑之材諒求氣而應聲
冀傳道而解惑作新文命式副崇臺勉勵之勤騷動士
林願見正道講明之盛幸毋多讓佇俟惠來謹疏

同文貞公謚議 太常博士王瓚撰

議曰明王在位不惟廟堂股肱之臣作新治道於其上
而尤賴夫巖穴嘉遯之士扶持世教於其下之二者並

行不倍然後可以化成天下也故太子左贊善同公以
高明奇特之資濟之以聖賢體用之學潛心講貫篤守
力行其道義足以善俗其文章足以華國雲輕軒冕芥
視功名逾五十年道積厥躬聲聞于上安車屢至辭疾
不行延祐六年英宗膺撫監寄博徵天下儒碩以處春
坊起公為贊善乃一至京師入見極開悟之道大槩以
為太子之職當朝夕君側問安視膳不宜遠處別宮以
曠定省上嘉納之識者以為得輔導體英皇嗣位力請

還山教授于家而道益增重清風高節邈不可及嗚呼
其所以扶持世教豈小補哉卹典所加公為不忝謹按
諡法道德博文曰文名實不爽曰貞諡以文貞公論惟
允謹議



渠菴集卷十五